



Juli 2024

Ukioq allortarlugu akiliunneqarluni feeriarluni angalanerit aamma makitsinikkut angalanerit pillugit paasissutissat

SIK-p allattoqarfianit allakkiaq paasissutissiissut sulisut peqatigiiffinut tamanut, sulisut sinniisaannut il.il.

SIK-p Sulinggifteqarluni Angalanermut Aningaasaateqarfia (feriefondimik taaginnar-neqartartoq) pillugu paasissutissarpassuaqarpoq SIK-p nittartagaani (www.sik.gl) atuarneqarsinnaasunik, taamaalillutik sulisut sinniisaat sulisartullu peqatigiiffiini ingerlatsisuusut feriefondip angalanissanik qaqugu qanorlu agguasarneri pillugit pisariaqartitaminnik paasissutissarsinnaaqullugit. Taamaattumillu paasissutissat nittartakkamiittut taakku atuarneqartarnissaat ilungersorlunga kajumissaarutigerusuppara.

Siullermik SIK-p feriefondia naatsumik oqaatigalugu feeriarluni angalanernut assigiingitsunut marlunnut ukununnga aningaasaliisartuuvoq:

- 1) Ukioq allortarlugu akiliunneqarluni angalanerit, aamma
- 2) Makitsinikkut angalanerit.

Matumuuna erseqqinnerusumik nassuiarneqassaaq aqqissuussinerit taakku **kikkunnut** atuutsinneqarnersut **qanorlu** ingerlanneqarnersut.

Ukioq allortarlugu akiliunneqarluni angalanerit

Sulisut ilaat Namminersorlutik Oqartussanik isumaqatigiissutit naapertorlugit ukioq allortarlugu akiliunneqarlutik angalasinnaatitaapput. Pineqartut tassaapput Namminersorlutik Oqartussani kommunimiluunniit qaammammusiaqarlutik sulisuusut uku:

1. Niuernermit allaffinnilu sulisut (isumaqatigiissut nr. 315)
2. Meeqqerisut isumaginninnermilu ikiortit (isumaqatigiissut nr. 326)
3. Peqqinnissamut ikiortit aamma ikorfartortit (isumaqatigiissut nr. 336).
4. Oqalutsit nutserisullu (isumaqatigiissut nr. 367)

Taamatutaaq SIK aamma Danmarkip naalagaaffia isumaqatigiissuteqarsimapput allaffimmiut oqalutsillu ukioq allortarlugu akiliunneqarlutik angalasinnaatitaassasut, soorlu eqqartuussivinni politiinilu sulisut.

Ilanngussaq: Feriefondip siulersuisui ukioq allortarlugu akiliunneqarluni angalasinnaanerup ingerlanneqarneranut **najoqqutassiorsimapput** (malittarisassiorsimapput). Taakku e-mailimut matumunnga kakkiullugit ilanngunneqarput, kaammattuutigerusunarporlu sulisut sinniisaasa peqatigiiffeqarnermilu ingerlatsisut najoqqutassiat taakku atuarluassagaat.

Najoqqutassiani imm. 2 malillugu sivikinnerpaamik ukiuni marlunni sulisimasariaqarpoq taamatut akiliunneqarluni angalasinnaassagaanni. Imm. 2-mi ima allassimasoqarpoq: *”Feriefondi angalanissanut aninngaasaliisarpoq pisortat suliffeqarfiutaanni atorfininnermit sivikinnerpaamik ukiuni marlunni ataannartumik tamatumunnga katersisima-gaanni. Ukiut katersiffiusut marluusut iluanni pisortani atorfimmu allamut nuunnermi sap. ak. 6 tikillugit katersinngitsoorsimagaanni tamanna qaqugu aningalanissamut akiliunneqarnissap naatsorsorneranut sunniuteqassanngilaq.”*

Tassa assersuutigalugu meeqqerisutut peqqinnissamullu ikiortitut 1. juuli 2024-mi Kommuneqarfik Sermersuumi atorfinissimagaanni siusinnerpaamik 1. juuli 2026-mi angalanissamut akiliunneqartoqarsinnaavoq – taamatut akiliunneqarnissamut pisinnaatitaaffeqarluni pisortani atorfeqariinngikkaanni piffissamik atorfeqarfiusumik naatsorsuinermi ilaasumik.

Imaappoq 1. juuli 2024-mi Kommuneqarfik Sermersuumi meeqqerisutut aallartissimagaanni, tamannali sioqqullugu Qeqqata Kommuniani 2022-mili taamatut atorfeqarsimalluni, taava ukioq manna 2024-mi akiliunneqarluni angalanissamik qinnuteqartoqarsinnaavoq. Taavalu 2024-p ingerlanerani taamatut akiliunneqarluni angalagaanni aat-saat ukiut marluk qaangiuppata SIK-p feriefondianit akiliunneqarluni angalaqqittoqarsinnaavoq (najoqqutassiani ukiut taakku marluusut piffissamik “katersiffiusumik” taaneqarput).

Allakkiami matumani aammattaaq **najoqqutassiani imm. 16 immikkut** sammilaarusuppara:

”Piffissap katersiffiusup nalaani sulisoq aapparisami imaluunniit sivikinnerpaamik ukiuni ataatsimi najugaqatigalugu inooqatigisami SIK-p feriefondianit imaluunniit feriefondimit allamit akiliunneqarluni imaluunniit makitaalluni angalasinnaanera atorlugu angalaqataappat, taassuma SIK-p feriefondianit angalanissamut akiliunneqarsinnaatitaanera atorunnaassaaq, apeqqutaanani aapparisaa/inooqatigisaa pisortani imaluunniit namminersortuni sulisuunersoq”.

Tassa assersuutigalugu qaammammusiaqarluni allaffimmiuulluni imaluunniit meeqqerisuulluni ukioq allortarlugu akiliunneqarluni angalasinnaatitaagaluaanniluunniit ta-

matumunnga SIK-p feriefondianit akiliunneqartoqarsinnaanngilaq piffissap katersiffiut sup ingerlanerani aapparisaq imaluunniit inooqatigisaq taamatut akiliunneqarluni angalasinnaatitaanera atorlugu angalasinnaareeraanni (aapparisaq/inooqatigisaq angalaqataagaanni).

Assersuutissat: Sulisunut immikkoortunut sisamanut qulaani taaneqartunut ilaagaluarluni taamalu akiliunneqarluni angalasinnaatitaagaluarluni qanoq pisoqaraangat akiliunneqarsinnaajunnaartoqassanerani:

- a. Assersuutigalugu kommunimi allaffimmioq imaluunniit meeqqerisoq 2024-mi aapparisaq/inooqatigisaq SIK-p feriefondianit akiliunneqarluni angalaneranut ilaavoq, akiliunneqataavoq.

Taava allaffimmioq imaluunniit meeqqerisoq taanna 2024-mi imaluunniit 2025-mi SIK-p feriefondianit akiliunneqarsinnaanngilaq. Aatsaat 2026-mi SIK-p feriefondianit akiliunneqarsinnaalissaaq – soorunami aapparisaq/inooqatigisaq 2026-mi akiliunneqarluni angalanissaanut ilaassanngikkuni.

- b. SIK-p isumaqatigiissutai naapertorlugit sulisuusoq aapparisaq/inooqatigisaq SIK-p feriefondianit *makitaalluni* 2024-mi angalaneranut ilaavoq. Taava sulisoq taanna 2024-mi imaluunniit 2025-mi SIK-p feriefondianit ukioq allortarlugu angalaneranut akiliunneqarsinnaanngilaq. Aatsaat 2026-mi SIK-p feriefondianit ukioq allortarlugu angalaneranut akiliunneqarsinnaalissaaq (ukiut marluk katersiffiummata).

- c. SIK-p isumaqatigiissutai naapertorlugit sulisuusoq 2024-mi aapparisaq/inooqatigisaq *feriefondimit allamit* (SIK-mut atanngitsumit) ukioq allortarlugu akiliunneqarluni angalaneranut ilaavoq (imaassinnaavoq aapparisaq/inooqatigisaq APK-p imaluunniit NPK-p isumaqatigiissutai malillugit sulisuusoq).

Taamaattoqartillugu SIK-p isumaqatigiissutai naapertorlugit sulisuusoq 2024-mi imaluunniit 2025-mi SIK-p feriefondianit ukioq allortarlugu angalaneranut akiliunneqarsinnaanngilaq. Aatsaat 2026-mi SIK-p feriefondianit ukioq allortarlugu angalaneranut akiliunneqarsinnaalissaaq – apequtaalluni aappariit/inooqatigiit ukioq taanna SIK-p feriefondianit akiliunneqarlutik angalarusunnersut, feriefondimit allamiunngitsoq.

Makitsinikkut angalanerit

SIK-p isumaqatigiissutai naapertorlugit sulisuusut – sulisut ilaannut immikkoortunut sisamanut ukioq allortarlugu akiliunneqarlutik angalasinnaatitaasunut taaneqareersunut ilaanngitsut – qinnuteqarsinnaapput ilaquuttatik qaninnerit ilagalugit 2025-mi sulinngiffeqarlutik angalanissaminut makitsinermut peqataajumallutik. Piffissaq

makitsinermut peqataanissamut qinnuteqarfiusoq aallartippoq ulloq 15. juuni naas-sallunilu ulloq 1. septembari.

Ilanngussaq: Feriefondip siulersuisui makitsinikkut angalanissamik agguaasarnermut **najoqqutassiorsimapput** (malittarisassiorsimapput). Taakku e-mailimut matumunnga kakkiullugit ilanngunneqarput, kaammattuutigerusunnarporlu sulisut sinniisaasa peqatigiiffeqarnermilu ingerlatsisut najoqqutassiat taakku atuarluassagaat.

Soorlu **najoqqutassiani imm. 7-mi** allassimasoq taamaallaat ukuiut sisamakkaarlugit makitsinikkut angalanissamik pissarsisoqarsinnaavoq. Assersuutigalugu 2024-mi angalanissamut makitaasimagaanni, taava ukioq taanna oktobarimi makitsisoqarnerani 2025-mi angalanissamik pissarsisoqarsinnaangilaq.

Alla maluginiartariaqartoq pingaarutilik **imm. 8-mi** allassimavoq: *“Qinnuteqartoq aapparisami / inooqatigisamiluunniit (sivikinnerpaamik ukiumi ataatsimi adressedqatigalugu najugaqatigisimasap) SIK-p Feriefondianit feriefondimilluunniit allamit ukioq allortarlugu angalanissamut akiliunneqarsinnaatitaanera atorlugu aamma taamatut akiliunneqarsinnaaguni makitsinikkut angalanissamik pissarsisinneqarsinnaangilaq.”*

Assersuutissat:

1. SIK-p isumaqatigiissutai naapertorlugit sulisuusoq aappaqaruni ukioq allortarlugu angalanissamut SIK-p feriefondianit akiliunneqarsinnaasumik (imaassinnaavoq aapparisaq taanna meeqqerisuusoq imaluunniit peqqinnissamut ikiortaasoq), taava SIK-p isumaqatigiissutai naapertorlugit sulisuusoq taanna makitsinikkut angalanissamik pissarsisinnaangilaq. Taamaattumik aapparmi ukioq allortarlugu akiliunneqarsinnaaneranut peqataasinnaanini “naammagisariaqassavaa”.
2. SIK-p isumaqatigiissutai naapertorlugit sulisuusoq aappaqaruni *feriefondimit allamit* (SIK-mut atangitsumit) ukioq allortarlugu akiliunneqarluni angalasinnaasumik (imaassinnaavoq aappaa APK-p imaluunniit NPK-p isumaqatigiissutai malillugit sulisuusoq), taava SIK-p isumaqatigiissutai naapertorlugit sulisuusoq taanna makitsinikkut angalanissamik pissarsisinnaangilaq.
3. SIK-p isumaqatigiissutai naapertorlugit sulisuusoq qaammatini marlussunni najugaqatigisaminik inooqateqarsimaguni (katissimanngisaminik) ukioq allortarlugu akiliunneqarluni angalanissamut pisinnaatitaaffilimmik: Taava SIK-p isumaqatigiissutai naapertorlugit sulisuusoq taanna makitsinermut peqataasinnaatitaavoq. Ukiarli ataaseq sinnerlugu najugaqatigiillutik inooqatigiissimappata pineqartoq makitsinermut peqataatinneqarsinnaangilaq.

Kiisalu **najoqqutassiani imm. 9-mi** ima allassimasoqarpoq: *“Ukioq allortarlugu SIK-p Feriefondianit akiliunneqarluni angalanissamut pisinnaatitaagaanni makitsinikkut angalanissamik qinnuteqartoqarsinnaangilaq”.*

Assersuutigalugu:

Soorlu pisortani allaffimmiutut, meeqqerisutut imaluunniit peqqinnissamut ikiortitut (sulisut immikkoortut sisamaasut taaneqareersut ilaattut) atorfeqaraanni makitsinikkut angalanissamik qinnuteqartoqarsinnaanngilaq. Tassami sulisut taakku ukioq allortarlugu angalanissamut akiliunneqarsinnaareerput.

SIK-p allattoqarfianut saaffiginneriannuaritsi!

Feriefondip angalanernut aaqqissuussineri assigiinngitsut marluusut pillugit, imaluunniit Feriefondip ingerlatseriaasia pillugu, apeqqutissaqarussi SIK-p allattoqarfianut saaffiginninnissamut tunuarsimaarniaqinasi.

Inussiarnersumik



Bjarne Petersen
Allattoqarfimmi pisortaq